

15.4.2024

A9-0307/2

Leasú 2

Cristian-Silviu Buşoi

thar ceann an Choiste um Thionsclaíocht, um Thaighde agus um Fhuinneamh

Tuarascáil

A9-0307/2023

Josianne Cutajar

Seirbhísí Slándála Bainistithe

(COM(2023)0208 – C9-0137/2023 – 2023/0108(COD))

Togra le haghaidh treorach

–

LEASUITHE Ó PHARLAIMINT NA hEORPA*

ar thogra ón gCoimisiún

RIALACHÁN (AE) 2024/...

Ó PHARLAIMINT NA hEORPA AGUS ÓN gCOMHAIRLE

an ...

**lena leasaítear Rialachán (AE) 2019/881 a mhéid a bhaineann le seirbhísí slándála
bainistithe**

(Téacs atá ábhartha maidir le LEE)

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 114 de,

Ag féachaint don togra ón gCoimisiún Eorpach,

* Leasuithe: léirítear téacs nua nó leasaithe le cló trom iodálach;; léirítear téacs atá scriosta trí leas a bhaint as an tsiombail **■** .

Tar éis dóibh an dréachtghníomh reachtach a chur chuig na parlaimintí náisiúnta,

Ag féachaint don tuairim ó Choiste Eacnamaíoch agus Sóisialta na hEorpa¹,

Tar éis di dul i gcomhairle le Coiste na Réigiún,

Ag gníomhú dóibh i gcomhréir leis an ngnáthnós imeachta reachtach²,

¹ *IO C 349, 29.9.2023, lch. 167.*

² *Seasamh ó Pharlaimint na hEorpa an ... [(IO ...)/(nár foilsíodh fós san Iris Oifigiúil)] agus Cinneadh ón gComhairle an*

De bharr an mhéid seo a leanas:

- (1) Le Rialachán (AE) 2019/881 ó Pharlaimint na hEorpa agus ón gComhairle³, cuirtear creat ar bun chun scéimeanna Eorpacha um dheimhniú cibearshlándála a bhunú ar mhaithe le leibhéal leormhaith cibearshlándála le haghaidh táirgí *teicneolaíochta faisnéise agus cumarsáide (TFC)*, seirbhísí TFC agus próisis TFC san Aontas a áirithiú, agus chun ilroinnt an mhargaidh inmheánaigh a sheachaint maidir le scéimeanna um dheimhniú cibearshlándála san Aontas.
- (2) *Chun athléimneacht an Aontais in aghaidh cibirionsaithe a áirithiú agus chun aon leochaileachtaí i margadh an Aontais a chosc, tá sé beartaithe leis an Rialachán seo go gcomhlánófar an creat rialála cothrománach lena mbunaítear ceanglais chuimsitheacha chibearshlándála le haghaidh gach táirge ag a bhfuil eilimintí digiteacha i gcomhréir le Rialachán (AE) .../... ó Pharlaimint na hEorpa agus ón gComhairle⁴ (2022/0272(COD)), trí cheanglais fhíor-riachtanacha a bhunú le haghaidh seirbhísí bainistithe cibearshlándála, chur i bhfeidhm na seirbhísí sin agus a n-iontaofachta.*

³ Rialachán (AE) 2019/881 ó Pharlaimint na hEorpa agus ón gComhairle an 17 Aibreán 2019 maidir le ENISA (Gníomhaireacht an Aontais Eorpaigh um Chibearshlándáil) agus maidir le deimhniú i ndáil le cibearshlándáil theicneolaíocht na faisnéise agus na cumarsáide agus lena n-aisghairtear Rialachán (AE) Uimh. 526/2013 (an Gníomh um Chibearshlándáil) (IO L 151, 7.6.2019, lch. 15).

⁴ *Rialachán (AE) .../... ó Pharlaimint na hEorpa agus ón gComhairle an ... maidir le ... (IO L ..., ELI: ...).*

- (3) Is iad seirbhísí slándála bainistithe *seirbhísí arna soláthar ag soláthraithe seirbhísí slándála bainistithe mar a shainmhínítear iad in Airteagal 6, pointe (40) de Threoir (AE) 2022/2555 ó Pharlaimint na hEorpa agus ón gComhairle⁵. Dá bhrí sin, ba cheart an sainmhíniú ar sheirbhísí slándála bainistithe sa Rialachán seo a bheith comhsheasmhach leis an sainmhíniú ar sholáthraithe seirbhísí slándála bainistithe i dTreoir (AE) 2022/2555. Is é atá i gceist leis na seirbhísí sin gníomhaíochtaí a bhaineann le bainistiú riosca cibearshlándála a gcustaiméirí, nó lena dtugtar cúnamh do na gníomhaíochtaí sin, **agus** tá tábhacht mhéadaitheach ag baint leo i ndáil le teagmhais chibearshlándála a chosc agus a mhaolú. Dá réir sin, meastar gur eintitis fhíor-riachtanacha nó thábhachtacha iad soláthraithe na seirbhísí sin a bhaineann le hearnáil ardchriticiúil de bhun Threoir (AE) 2022/2555 . De bhun Aithris 86 den Treoir sin, tá tábhacht ar leith leis an ról atá ag soláthraithe seirbhísí slándála bainistithe i réimsí amhail freagairt ar theagmhais, tástáil treáite, iniúchtaí slándála agus an chomhairleoireacht chun cúnamh a thabhairt d'eintitis lena n-iarrachtaí teagmhais a chosc agus a bhrath, freagairt dóibh nó téarnamh uathu. Mar sin féin, díriodh cibirionsaithe freisin ar sholáthraithe seirbhísí slándála bainistithe, agus mar gheall ar a ndlúth-chomhtháthú in oibríochtaí a gcustaiméirí, tá riosca ar leith ag baint leo. Dá bhrí sin, ba cheart d'eintitis fhíor-riachtanacha agus thábhachtacha de réir bhrí Threoir (AE) 2022/2555 a bheith níos dícheallaí agus soláthraí seirbhísí slándála bainistithe á roghnú acu.*

⁵ Treoir (AE) 2022/2555 ó Pharlaimint na hEorpa agus ón gComhairle an 14 Nollaig 2022 maidir le bearta le haghaidh ardleibhéal comhchoiteann cibearshlándála ar fud an Aontais, lena leasaítear Rialachán (AE) Uimh. 910/2014 agus Treoir (AE) 2018/1972, agus lena n-aisghairtear Treoir (AE) 2016/1148 (an Dara Treoir NIS) (IO L 333, 27.12.2022, lch. 80).

(4) *Áirítear sa sainmhíniú ar sheirbhísí slándála bainistithe faoin Rialachán seo liosta neamh-uileghabhálach de sheirbhísí slándála bainistithe a d'fhéadfadh cáiliú do scéimeanna deimhniúcháin, amhail láimhseáil teagmhas, tástáil treáite, iniúchtaí slándála, agus comhairliúchán a bhaineann le tacaíocht theicniúil. D'fhéadfadh seirbhísí slándála bainistithe seirbhísí cibearshlándála a chuimsiú a thacaíonn le hullmhacht, cosc, brath, anailísiú, maolú, freagairt ar theagmhais chibearshlándála agus téarnamh uathu. D'fhéadfadh soláthar faisnéise cibearbhagairtí agus measúnú riosca a bhaineann le tacaíocht theicniúil cáiliú mar sheirbhísí slándála bainistithe freisin. D'fhéadfadh scéimeanna Eorpacha ar leithligh um dheimhniú cibearshlándála le haghaidh seirbhísí slándála bainistithe éagsúla a bheith ann. Ba cheart tagairt a dhéanamh sna deimhnithe Eorpacha cibearshlándála arna n-eisiúint i gcomhréir leis na scéimeanna sin do sheirbhísí slándála bainistithe sonracha de chuid soláthraí sonracha de na seirbhísí sin.*

- (5) *Is féidir le soláthraithe seirbhísí slándála bainistithe ról tábhachtach a bheith acu freisin maidir le gníomhaíochtaí an Aontais lena dtacaítear le freagairt agus téarnamh láithreach i gcás teagmhais chibearshlándála shuntasacha agus mhórsála, ag brath ar sheirbhísí ó sholáthraithe príobháideacha iontaofa agus ar thástáil eintiteas criticiúil le haghaidh leochaileachtaí féideartha bunaithe ar mheasúnuithe riosca an Aontais. D'fhéadfadh sé go mbeadh ról ag deimhniú seirbhísí slándála bainistithe i roghnú soláthraithe iontaofa .*
- (6) Ní hamháin go bhfuil deimhniú seirbhísí slándála bainistithe ábhartha sa phróiseas roghnúcháin do Chúltaca Cibearshlándála an Aontais ach is táscaire cáilíochta riachtanach é freisin le haghaidh eintitis príobháideacha agus phoiblí a bhfuil sé beartaithe acu seirbhísí den sórt sin a cheannach. I bhfianaise chriticiúlacht na seirbhísí slándála bainistithe agus íogaireacht na sonraí a phróiseálann siad, d'fhéadfaí treoraíocht agus dearbhú tábhachtach maidir le hiontaofacht na seirbhísí sin a chur ar fáil do chustaiméirí ionchasacha leis an deimhniú. Le scéimeanna deimhniúcháin Eorpacha le haghaidh seirbhísí slándála bainistithe, rannchuidítear le hilroinnt an mhargaidh inmheánaigh a sheachaint. Dá bhrí sin, tá sé d'aidhm ag an Rialachán seo feidhmiú an mhargaidh inmheánaigh a fheabhsú.

(7) *Maidir le scéimeanna deimhniúcháin Eorpacha le haghaidh seirbhísí slándála bainistithe, ba cheart go mbeadh glacadh na seirbhísí sin agus iomaíocht mhéadaithe idir soláthraithe a sholáthraíonn seirbhísí slándála bainistithe mar thoradh ar na scéimeanna sin. Gan dochar don chuspóir leibhéal leordhóthanacha agus iomchuí d'eolas teicniúil ábhartha agus sláine ghairmiúil na soláthraithe sin a áirithiú, ba cheart do scéimeanna deimhniúcháin, dá bhrí sin, iontráil sa mhargadh agus tairiscint seirbhísí slándála bainistithe a éascú, trí shimpliú a dhéanamh, a mhéid is féidir, ar an ualach rialála, riaracháin agus airgeadais a d'fhéadfadh a bheith ar sholáthraithe, go háirithe micrifhiontair nó fiontair bheaga agus mheánmhéide (FBManna), agus seirbhísí slándála bainistithe á dtairiscint acu. Ina theannta sin, chun glacadh seirbhísí slándála bainistithe a spreagadh agus an t-éileamh orthu a spreagadh, ba cheart do na scéimeanna rannchuidiú lena n-inrochtaineacht, go háirithe le haghaidh gníomhaithe beaga, amhail micrifhiontair agus FBManna, chomh maith le húdaráis áitiúla agus réigiúnacha a bhfuil acmhainneacht agus acmhainní teoranta acu, ach a bhíonn níos mó i mbaol sáruithe cibearshlándála a bhfuil impleachtaí airgeadais, dlíthiúla, clú agus oibríochtúla acu.*

- (8) *Tá sé tábhachtach tacaíocht a thabhairt do mhicrifhiontair agus d'fhiontair bheaga agus mheánmhéide (FBManna) chun an Rialachán seo a chur chun feidhme agus chun na sainscileanna agus saineolas cibearshlándála is gá a fháil chun seirbhísí slándála bainistithe a sholáthar atá i gcomhréir leis na ceanglais a leagtar síos sa Rialachán seo. Foráiltear leis an gClár don Eoraip Dhigiteach agus le cláir ábhartha eile de chuid an Aontais gur cheart don Choimisiún tacaíocht airgeadais agus theicniúil a bhunú lena gcuirfear ar chumas na bhfiontar sin rannchuidiú le fás gheilleagar na hEorpa agus leibhéal coiteann na cibearshlándála Eorpaí a neartú i dtírdhreach an Aontais, lena n-áirítear trí chuíchóiriú a dhéanamh ar an tacaíocht airgeadais ón gClár don Eoraip Dhigiteach agus ó chláir ábhartha eile de chuid an Aontais agus trí thacaíocht a thabhairt do mhicrifhiontair agus do FBManna.*
- (9) *Le scéim deimhniúcháin an Aontais le haghaidh seirbhísí slándála bainistithe, ba cheart go rannchuideofaí le seirbhísí slána ardcháilíochta a chur ar fáil lena ráthaítear aistriú digiteach sábháilte agus spriocanna a leagtar amach i gClár Beartais don Deacáid Dhigiteach a bhaint amach, go háirithe maidir leis an sprioc go dtosóidh 75 % de ghnóthais an Aontais ag baint úsáid as néalríomhaireacht, IS nó Mórshonraí, go mbainfidh níos mó ná 90 % de mhicrifhiontair agus FBManna leibhéal bunúsach déine digití amach ar a laghad agus go dtairgfear príomhsheirbhísí poiblí ar líne.*

- (10) Chomh maith le táirgí TFC, seirbhísí TFC nó próisis TFC a chur in úsáid, cuirtear gnéithe seirbhíse breise ar fáil go minic le seirbhísí slándála bainistithe, ar gnéithe iad a bhíonn ag brath ar inniúlachtaí, saineolas agus taithí a bhfoirne. Ba cheart leibhéal an-ard de na hinniúlachtaí sin, den saineolas sin agus den taithí sin, chomh maith le nósanna imeachta inmheánacha iomchuí, a bheith mar chuid de na cuspóirí slándála chun cáilíocht an-ard de na seirbhísí slándála bainistithe a chuirtear ar fáil a áirithiú. Chun a áirithiú gur féidir gach gné de **sheirbhísí** slándála bhainistithe a chumhdach le **scéimeanna tiomnaithe** deimhniúcháin, is gá, dá bhrí sin, Rialachán (AE) 2019/881 a leasú. Ba cheart **torthaí agus moltaí na meastóireachta agus an athbhreithnithe dá bhforáiltear i Rialachán (AE) 2019/881 a chur san áireamh.**
- (11) ***D'fhonn fás margaidh iontaofa de chuid an Aontais a éascú, agus comhpháirtíochtaí á gcruthú le tríú tíortha atá ar aon intinn leis an Aontas, ba cheart go ndéanfaí an próiseas deimhnithe a bhunaítear sa chreat arna bhunú leis an Rialachán seo a chuíchóiriú chun aithint idirnáisiúnta agus ailíniú le caighdeáin idirnáisiúnta a áirithiú.***

(12) *Tá bearna thallainne roimh an Aontas, arb é is príomhthréith di ganntanas gairmithe oilte, chomh maith le bagairtí atá ag athrú go tapa mar a aithnítear i dteachtaireacht ón gCoimisiún an 18 Aibreán 2023 maidir leis an Acadamh Scileanna Cibearshlánda. Tá éagsúlacht idir na hacmhainní oideachais agus na cineálacha oiliúna foirmiúla agus is féidir eolas a fháil ar bhealaí éagsúla, ar bhealach foirmiúil, mar shampla tríd an ollscoil nó cúrsaí, agus ar bhealach neamhfoirmiúil, mar shampla trí oiliúint ar an láthair oibre nó taithí oibre sa réimse ábhartha. Dá bhrí sin, chun teacht chun cinn seirbhísí slándála bainistithe bunriachtanacha ar ardcháilíocht a éascú agus chun forléargas níos fearr a fháil ar chomhdhéanamh lucht saothair cibearshlánda an Aontais, tá sé tábhachtach go neartófaí comhar idir na Ballstáit, an Coimisiún, ENISA agus geallsealbhóirí, lena n-áirítear an earnáil phríobháideach agus an lucht acadúil, trí chomhpháirtíochtaí príobháideacha poiblí a fhorbairt, trí thacú le tionscnaimh taighde agus nuálaíochta, trí chaighdeáin chomhchoiteanna agus deimhniú scileanna cibearshlánda a fhorbairt agus a aithint go frithpháirteach, lena n-áirítear tríd an gCreat Eorpach um Scileanna Cibearshlánda. Leis an gcomhar sin, dhéanfaí soghluaisteacht gairmithe cibearshlánda laistigh den Aontas a éascú chomh maith le comhtháthú eolais agus oiliúna a bhaineann leis an gcibearshlánda i gclár oideachais, agus rochtain ar phrintíseachtaí agus ar chúrsaí oiliúna a áirithiú do dhaoine óga, lena n-áirítear daoine a bhfuil cónaí orthu i réigiúin faoi mhíbhuntáiste, amhail oileáin, ceantair inar tearc an daonra, ceantair thuaithe agus ceantair iargúlta. Tá sé tábhachtach go mbeidh sé d’aidhm ag na bearta sin níos mó ban agus cailíní a mhealladh sa réimse agus rannchuidiú le haghaidh a thabhairt ar an mbearna idir na hinscní san eolaíocht, sa teicneolaíocht, san innealtóireacht agus sa mhatamaitic, agus go bhfuil sé d’aidhm ag an earnáil phríobháideach oiliúint sa láthair oibre a chur ar fáil lena dtabharfar aghaidh ar na scileanna is mó atá ar éileamh, lena mbaineann an riarachán poiblí agus gnólachtaí nuathionscanta, chomh maith le micrifhiontair agus FBManna. Tá sé tábhachtach freisin go n-oibreodh na soláthraithe agus na Ballstáit i gcomhar le chéile agus go rannchuideodh siad le bailiú sonraí a bhaineann leis an staid agus le héabhlóid an mhargaidh saothair cibearshlánda.*

- (13) *Tá ról tábhachtach ag ENISA maidir le scéimeanna iarrthacha Eorpacha um dheimhniú a ullmhú. Ba cheart don Choimisiún measúnú a dhéanamh ar na hacmhainní buiséadacha is gá le haghaidh phlean bunaíochta ENISA, i gcomhréir leis an nós imeachta a leagtar amach in Airteagal 29 de Rialachán (AE) 2019/881, agus dréachtbhuiséad ginearálta an Aontais á ullmhú aige.*
- (14) *Déantar foráil sa Rialachán seo maidir le leasuithe spriocdhírthe ar Rialachán (AE) 2019/881 chun an fhéidearthacht a chur isteach scéimeanna um dheimhniú cibearshlándála a chruthú do sholáthraithe seirbhísí slándála bainistithe. Agus an méid sin á dhéanamh aige, sonraítear agus soiléirítear forálacha áirithe a bhaineann le hullmhú agus le feidhmiú na scéimeanna Eorpacha um dheimhniú cibearshlándála uile d'fhonn a dtrédhearcacht agus a n-oscailteacht a áirithiú. Leis na leasuithe deireanacha sin, atá teoranta do shonrú nó do shoiléiriú Rialachán (AE) 2019/881, go háirithe na leasuithe ar Airteagail 49 agus 49a, níor cheart réamhbhreithiúnas a dhéanamh, ar bhealach ar bith, ar mheastóireacht agus athbhreithniú níos leithne an Rialacháin sin a cheanglaítear faoi Airteagal 67 de, lena n-áirítear go sonrach meastóireacht ar thionchar, ar éifeachtacht agus ar éifeachtúlacht Theideal an Rialacháin sin a bhaineann le scéimeanna um dheimhniú i ndáil le cibearshlándáil. Ba cheart an mheastóireacht agus an t-athbhreithniú sin maidir leis an Teideal a bhaineann le scéimeanna um dheimhniú i ndáil le cibearshlándáil a bheith bunaithe ar chomhairliúchán leathan leis na geallsealbhóirí agus ar anailís iomlán chríochnúil ar na nósanna imeachta lena mbaineann.*

- (15) *Ós rud é nach féidir leis na Ballstáit cuspóir an Rialacháin seo, eadhon glacadh scéimeanna Eorpacha um dheimhniú cibearshlándála le haghaidh seirbhísi slándála bhainistithe a éascú, a ghnóthú go leordhóthanach agus, de bharr fhairsinge agus éifeachtaí an Rialacháin, gur fearr is féidir é a ghnóthú ar leibhéal an Aontais, féadfaidh an tAontas bearta a ghlacadh, i gcomhréir le prionsabal na coimhdeachta a leagtar amach in Airteagal 5 den Chonradh ar an Aontas Eorpach. I gcomhréir le prionsabal na comhréireachta a leagtar amach san Airteagal sin, ní théann an Rialachán seo thar a bhfuil riachtanach chun an cuspóir sin a ghnóthú.*
- (16) *Chuathas i gcomhairle leis an Maoirseoir Eorpach ar Chosaint Sonraí i gcomhréir le hAirteagal 42(1) de Rialachán (AE) 2018/1725 ó Pharlaimint na hEorpa agus ón gComhairle⁶ agus thug sé a thuairim uaidh an 10 Eanáir 2024⁷,*

TAR ÉIS AN RIALACHÁN SEO A GHLACADH:

⁶ *Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil le sonraí pearsanta a phróiseáil ag institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch. 39).*

⁷ *IO C .../...*

Airteagal 1

Leasuithe ar Rialachán (AE) 2019/881

Leasaítear Rialachán (AE) 2019/881 mar a leanas:

- (1) in Airteagal 1(1), an chéad fhomhír, cuirtear an méid seo a leanas in ionad phointe (b):
 - ‘(b) creat chun scéimeanna Eorpacha um dheimhniú cibearshlándála a bhunú ar mhaithe le leibhéal leormhaith cibearshlándála le haghaidh táirgí TFC, seirbhísí TFC, próisis TFC, agus seirbhísí slándála bainistithe san Aontas a áirithiú, agus chun ilroinnt an mhargaidh inmheánaigh a sheachaint maidir le scéimeanna um dheimhniú cibearshlándála san Aontas.’;
- (2) Leasaítear Airteagal 2 mar a leanas:
 - (a) cuirtear an méid seo a leanas in ionad phointí 9, 10 agus 11:
 - ‘(9) ciallaíonn ‘scéim Eorpach um dheimhniú cibearshlándála’ tacar cuimsitheach rialacha, ceanglais theicniúila, caighdeáin agus nósanna imeachta a bhunaítear ar leibhéal an Aontais agus a bhfuil feidhm acu maidir le deimhniú nó measúnú comhréireachta táirgí TFC sonracha, seirbhísí TFC sonracha, próisis TFC shonracha nó seirbhísí slándála bainistithe sonracha;

- (10) ciallaíonn ‘scéim náisiúnta um dheimhniú cibearshlándála’ tacar cuimsitheach rialacha, ceanglais theicniúla, caighdeáin agus nósanna imeachta arna bhforbairt agus arna nglacadh ag údarás poiblí náisiúnta agus a bhfuil feidhm acu maidir le deimhniú nó measúnú comhréireachta táirgí TFC, seirbhísí TFC, próisis TFC agus seirbhísí slándála bainistithe a chuimsítear faoi raon feidhme na scéime áirithe sin;
- (11) ciallaíonn ‘deimhniú Eorpach cibearshlándála’ doiciméad a eisíonn comhlacht ábhartha lena bhfianaítear go bhfuiltear tar éis meastóireacht a dhéanamh ar an táirge TFC, seirbhís TFC, próiseas TFC nó seirbhís slándála bhainistithe atá i gceist maidir le comhlíonadh na gceanglas slándála sonracha arna leagan síos i scéim Eorpach um dheimhniú cibearshlándála;’;
- (b) cuirtear an pointe seo a leanas isteach:
- ‘(14a) ciallaíonn ‘seirbhís slándála bhainistithe’ seirbhís *a sholáthraítear do thríú páirtí* lena ndéantar gníomhaíochtaí a bhaineann le bainistiú riosca cibearshlándála, nó lena dtugtar cúnamh dóibh, *amhail láimhseáil* teagmhas, tástáil treáite, iniúchtaí slándála agus *comhairliúchán, lena n-áirítear comhairle ó shaineolaithe, a bhaineann le tacaíocht theicniúil*;’;

- (c) cuirtear an méid seo a leanas in ionad phointí 20, 21 agus 22:
- ‘(20) ciallaíonn ‘sonraíochtaí teicniúla’ doiciméad lena bhforordaítear na ceanglais theicniúla nach mór do tháirge TFC, seirbhís TFC, próiseas TFC nó seirbhís slándála bhainistithe a chomhlíonadh, nó nósanna imeachta um measúnú comhréireachta a bhaineann leis an méid sin;
- (21) ciallaíonn ‘leibhéal dearbhúcháin’ bonn don mhuinín go gcomhlíontar ceanglais slándála de scéim Eorpach shonrach um dheimhniú cibearshlándála le táirge TFC, seirbhís TFC, próiseas TFC nó seirbhís slándála bhainistithe, agus lena luaitear an leibhéal ag a ndearnadh an mheastóireacht ar tháirge TFC, seirbhís TFC, próiseas TFC nó seirbhís slándála bhainistithe ach, mar sin, nach ndéantar leis slándáil an táirge TFC, na seirbhíse TFC, an phróisis TFC nó na seirbhíse slándála bainistithe lena mbaineann a thomhas;

(22) ciallaíonn ‘féinmheasúnú comhréireachta’ gníomh a dhéanann monaróir nó soláthraí táirgí TFC, seirbhísí TFC, próisis TFC nó seirbhísí slándála bainistithe, lena ndéantar meastóireacht ar cibé an bhfuil na ceanglais i scéim Eorpach shonrach um dheimhniú cibearshlándála á gcomhlíonadh leis na táirgí TFC, seirbhísí TFC, próisis TFC nó seirbhísí slándála bainistithe sin;’;

(3) in Airteagal 4, cuirtear an méid seo a leanas in ionad mhír 6:

‘6. Cuirfidh ENISA úsáid an deimhnithe Eorpaigh cibearshlándála chun cinn d’fhonn ilroinnt an mhargaidh inmheánaigh a sheachaint. Rannchuideoidh ENISA le creat Eorpach um dheimhniú cibearshlándála a bhunú agus a choinneáil ar bun i gcomhréir le Teideal III den Rialachán seo, d’fhonn trédhearcacht chibearshlándáil na dtáirgí TFC, na seirbhísí TFC, na bpróiseas TFC agus na seirbhísí slándála bainistithe a mhéadú agus, ar an gcaoi sin, an mhuinín as an margadh digiteach inmheánach agus a iomaíochas a threisiú.’;

(4) Leasaítear Airteagal 8 mar a leanas:

(a) cuirtear an méid seo a leanas in ionad mhír 1:

‘1. Déanfaidh ENISA forbairt agus cur chun feidhme bheartas an Aontais maidir le deimhniú cibearshlándála táirgí TFC, seirbhísí TFC, próisis TFC agus seirbhísí slándála bainistithe mar a bhunaítear le Teideal III den Rialachán seo a chur chun cinn agus tacóidh sé leis an méid sin trí na nithe seo a leanas:

(a) faireachán a dhéanamh ar bhonn leanúnach ar fhorbairtí i réimsí gaolmhara a bhaineann leis an gcaighdeánú agus sonraíochtaí iomchuí teicniúla a mholadh a úsáidfear chun scéimeanna Eorpacha um dheimhniú cibearshlándála a fhorbairt de bhun Airteagal 54(1), pointe (c), i gcás nach mbíonn fáil ar chaighdeáin;

- (b) scéimeanna iarrthacha Eorpacha um dheimhniú cibearshlándála ('scéimeanna iarrthacha') a ullmhú do tháirgí TFC, seirbhísí TFC, próisis TFC agus seirbhísí slándála bainistithe i gcomhréir le hAirteagal 49;
 - (c) meastóireacht a dhéanamh ar scéimeanna Eorpacha um dheimhniú cibearshlándála i gcomhréir le hAirteagal 49(8);
 - (d) páirt a ghlacadh in athbhreithnithe piaraí de bhun Airteagal 59(4);
 - (e) cuidiú leis an gCoimisiún rúnaíocht a sholáthar don ECCG de bhun Airteagal 62(5).';
- (b) cuirtear an méid seo a leanas in ionad mhír 3:
- ‘3. Déanfaidh ENISA treoirínte a thiomsú agus a fhoilsiú agus dea-chleachtais a fhorbairt, maidir le ceanglais chibearshlándála le haghaidh táirgí TFC, seirbhísí TFC, próisis TFC agus seirbhísí slándála bainistithe, i gcomhar leis na húdaráis náisiúnta um dheimhniú cibearshlándála agus le hearnáil na tionsclaíochta ar bhealach foirmiúil struchtúrtha trédhearcach.’;

(c) cuirtear na méid seo a leanas in ionad mhír 5:

‘5. Éascóidh ENISA bunú agus glacadh caighdeán Eorpach agus idirnáisiúnta i dtaobh bainistiú riosca agus i dtaobh slándáil táirgí TFC, seirbhísí TFC, próisis TFC agus seirbhísí slándála bainistithe.’;

(5) in Airteagal 46, cuirtear an méid seo a leanas in ionad mhíreanna 1 agus 2:

‘1. Bunófar an creat Eorpach um dheimhniú cibearshlándála chun na dálaí maidir le feidhmiú an mhargaidh inmheánaigh a fheabhsú trí leibhéal na cibearshlándála a mhéadú laistigh den Aontas ionas gur féidir cur chuige comhchuibhithe a bheith ann ar leibhéal an Aontais i dtaca le scéimeanna Eorpacha um dheimhniú cibearshlándála, d’fhonn margadh aonair digiteach a chruthú le haghaidh táirgí TFC, seirbhísí TFC, próisis TFC agus seirbhísí slándála bainistithe.’;

2. Leis an gcreat Eorpach um dheimhniú cibearshlándála, déanfar foráil maidir le sásra chun scéimeanna Eorpacha um dheimhniú cibearshlándála a bhunú. Fianófar leis go gcomhlíonfaidh na táirgí TFC, seirbhísí TFC agus próisis TFC a ndearnadh meastóireacht orthu i gcomhréir le scéimeanna den chineál sin ceanglais shonracha slándála chun infhaighteacht, barántúlacht, sláine agus rúndacht sonraí atá stóráilte nó tarchurtha nó próiseáilte nó feidhmeanna nó na seirbhísí a chuirtear ar fáil leis na táirgí, seirbhísí agus próisis sin ar feadh a saolré a chosaint. Ina theannta sin, fianófar leis go gcomhlíonfaidh seirbhísí slándála bainistithe a ndearnadh meastóireacht orthu i gcomhréir le scéimeanna den chineál sin ceanglais shonracha slándála chun infhaighteacht, barántúlacht, sláine agus rúndacht sonraí a bhfaightear rochtain orthu, a phróiseáiltear, a stóráiltear nó a tharchuirtear maidir le soláthar na seirbhísí sin, agus go soláthróidh baill foirne a bhfuil leibhéal **leordhóthanach agus iomchuí** eolais theicniúil ábhartha agus ionracais ghairmiúil acu na seirbhísí sin go leanúnach leis an inniúlacht, an saineolas agus an taithí is gá. ’;

- (6) in Airteagal 47, cuirtear an méid seo a leanas in ionad mhíreanna 2 agus 3:
- ‘2. Áireofar go háirithe ar chláir oibre rollach an Aontais liosta de tháirgí TFC, de sheirbhísí TFC, de phróisis TFC nó de chatagóirí díobh sin, agus liosta de sheirbhísí slándála bainistithe, a bheadh in ann leas a bhaint as bheith san áireamh i raon feidhme scéime Eorpaí um dheimhniú cibearshlándála.
 3. Is ar aon cheann amháin nó níos mó de na forais seo a leanas a dhéanfar táirgí TFC, seirbhísí TFC agus próisis TFC nó catagóirí díobh sin, nó de sheirbhísí slándála bainistithe, a áireamh ar chláir oibre rollach an Aontais:
 - (a) scéimeanna náisiúnta um dheimhniú cibearshlándála a bheith ar fáil agus á bhforbairt lena gcumhdaítear aon chatagóir ar leith de tháirgí TFC, de sheirbhísí TFC, de phróisis TFC nó de sheirbhísí slándála bainistithe agus, go háirithe, i dtaca leis an riosca ilroinnte;
 - (b) dlí nó beartas ábhartha de chuid an Bhallstáit nó an Aontais;

- (c) éileamh an mhargaidh;
- (ca) *forbairtí teicneolaíocha agus infhaighteacht agus forbairt scéimeanna idirnáisiúnta um dheimhniú cibearshlándaála agus caighdeán idirnáisiúnta agus tionsclaíoch;*
- (d) forbairtí i réimse na mbagairtí cibearshlándaála;
- (e) iarratas go n-ullmhófaí scéim iarrthach shonrach ag ECCG.’;

(7) **█** *Leasaítear* Airteagal 49 *mar a leanas*:

- (a) *cuirtear an méid seo a leanas in ionad mhíreanna 1, 2, 3 agus 4:*
- ‘1. Arna iarraidh sin don Choimisiún de bhun Airteagal 48, ullmhóidh ENISA scéim iarrthach Eorpach um dheimhniú cibearshlándála a chomhlíonann na ceanglais is infheidhme a leagtar amach in Airteagail 51, 51a, 52 agus 54.*
 - 2. Arna iarraidh sin don ECCG de bhun Airteagal 48(2), féadfaidh ENISA scéim iarrthach a ullmhú a chomhlíonfaidh na ceanglais is infheidhme a leagtar amach in Airteagail 51, 51a, 52 agus 54 den Rialachán seo. Má dhiúltaíonn ENISA an iarraidh sin, léireofar cúiseanna an chinnidh sin. Is é an Bord Bainistíochta a dhéanfaidh aon chinneadh faoi iarraidh den sórt sin a dhiúltú.’;*
 - 3. Agus scéim iarrthach á hullmhú aici, rachaidh ENISA i gcomhairle leis na geallsealbhóirí ábhartha go léir go tráthúil trí phróiseas comhairliúcháin atá foirmiúil, oscailte, trédhearcach agus cuimsitheach. Agus an scéim iarrthach á tarchur chuig an gCoimisiún, de réir Airteagal 49(6), cuirfidh ENISA faisnéis ar fáil faoin gcaoi ar chomhlíon sé an oibleagáid sin.*

4. *I gcás gach scéim iarrthach, bunóidh ENISA meitheal ad hoc i gcomhréir le hAirteagal 20(4) agus é mar chuspóir léi comhairle shonrach agus saineolas sonracha a chur ar fáil do ENISA. Áireofar ar na meithleacha ad hoc a bhunófar chun na críche sin, de réir mar is iomchuí agus gan dochar do na nósanna imeachta agus don lánrogha arna mbunú le hAirteagal 20(4), saineolaithe ó riaracháin phoiblí na mBallstát, ó institiúidí, ó chomhlachtaí, ó oifigí agus ó ghníomhaireachtaí an Aontais, agus ón earráil phríobháideach.’;*

(b) *cuirtear na méid seo a leanas in ionad mhír 7:*

‘7. Féadfaidh an Coimisiún, ar bhonn na scéime iarrthaí arna hullmhú ag ENISA, gníomhartha cur chun feidhme a ghlacadh, lena ndéantar foráil maidir le scéim Eorpach um dheimhniú cibearshlándála le haghaidh táirgí TFC, seirbhísí TFC, próisis TFC agus seirbhísí slándála bainistithe, lena gcomhlíontar na ceanglais a leagtar amach in Airteagail 51, **51a**, 52 agus 54. Glacfar na gníomhartha cur chun feidhme sin i gcomhréir leis an nós imeachta scrúdúcháin dá dtagraítear in Airteagal 66(2).’;

(8) Cuirtear an tAirteagal seo a leanas isteach:

‘Airteagal 49a

Faisnéis agus comhairliúchán maidir leis na scéimeanna Eorpacha um dheimhniú cibearshlándála

- 1. Cuirfidh an Coimisiún ar fáil go poiblí an fhaisnéis i ndáil lena iarraidh ar ENISA scéim iarrthach a ullmhú nó athbhreithniú a dhéanamh ar scéim Eorpach um dheimhniú cibearshlándála atá ann cheana dá dtagraítear in Airteagal 48.***
- 2 Agus scéim iarrthach á hullmhú ag ENISA i gcomhréir le hAirteagal 49, féadfaidh Parlaimint na hEorpa agus an Chomhairle a iarraidh ar an gCoimisiún ina cháil mar chathaoirleach ar an nGrúpa Eorpach um Dheimhniú Cibearshlándála (ECCG) agus ar ENISA faisnéis ábhartha maidir le dréachtscéim iarrthach a chur i láthair ar bhonn ráithiúil. Arna iarraidh sin do Pharlaimint na hEorpa nó don Chomhairle, féadfaidh ENISA, i gcomhaontú leis an gCoimisiún, agus gan dochar d’Airteagal 27, codanna ábhartha de dhréachtscéim iarrthach a chur ar fáil do Pharlaimint na hEorpa agus don Chomhairle ar bhealach atá iomchuí don leibhéal rúndachta is gá, agus i gcás inarb iomchuí ar bhealach srianta.***

3. *Chun an t-idirphlé idir institiúidí an Aontais a fheabhsú agus chun rannchuidiú le próiseas comhairliúcháin foirmiúil, oscailte, trédhearcach agus cuimsitheach, féadfaidh Parlaimint na hEorpa, mar aon leis an gComhairle, iarraidh ar an gCoimisiún agus ar ENISA plé a dhéanamh ar ábhair a bhaineann le feidhmiú scéimeanna Eorpacha um dheimhniú cibearshlándála do tháirgí TFC, do sheirbhísí TFC, do phróisis TFC nó do sheirbhísí slándála bainistithe.*
4. *Nuair a bheidh meastóireacht á déanamh ar an Rialachán seo i gcomhréir le hAirteagal 67, cuirfidh an Coimisiún san áireamh, i gcás inarb iomchuí, eilimintí a eascraíonn as na tuairimí a chuir Parlaimint na hEorpa agus an Chomhairle in iúl maidir leis na hábhair dá dtagraítear i mír 3 den Airteagal seo.’;*

- (9) Leasaítear Airteagal 51 mar a leanas:
- (a) cuirtear an méid seo a leanas in ionad an teidil:
‘Cuspóirí slándála scéimeanna Eorpacha um dheimhniú cibearshlándála le haghaidh táirgí TFC, seirbhísí TFC agus próisis TFC’
 - (b) cuirtear an méid seo a leanas in ionad na habairte réamhráití:
‘Déanfar scéim Eorpach um dheimhniú cibearshlándála le haghaidh táirgí TFC, seirbhísí TFC, nó próisis TFC a dhearadh ionas go mbainfear amach ar a laghad na cuspóirí slándála seo a leanas, de réir mar is infheidhme:’
- (10) Cuirtear an tAirteagal seo a leanas isteach:
- ‘Airteagal 51a
- Cuspóirí slándála scéimeanna Eorpacha um dheimhniú cibearshlándála le haghaidh seirbhísí slándála bainistithe
- Déanfar scéim Eorpach um dheimhniú cibearshlándála le haghaidh seirbhísí slándála bainistithe a dhearadh ionas go mbainfear ar a laghad na cuspóirí slándála seo a leanas amach, de réir mar is infheidhme:

- (a) ■ go soláthrófar na seirbhísí slándála bainistithe leis an inniúlacht, an saineolas agus an taithí is gá, lena n-áirítear go mbeidh leibhéal **leordhóthanach agus iomchuí** eolais theicniúil agus inniúlachta sa réimse sonrath, taithí leordhóthanach agus iomchuí, agus an leibhéal is airde ionracais ghairmiúil ag na baill foirne atá freagrach as na seirbhísí sin a sholáthar;
- (b) ■ go mbeidh nósanna imeachta inmheánacha iomchuí i bhfeidhm ag an soláthraí chun a áirithiú go soláthrófar na seirbhísí slándála bainistithe ar leibhéal **leordhóthanach agus iomchuí** i gcónaí;
- (c) **chun** sonraí a bhfaightear rochtain orthu, a stóráiltear, a tharchuirtear nó a phróiseáiltear ar shlí eile i ndáil le soláthar seirbhísí slándála bainistithe, na sonraí sin a chosaint ar rochtain, stóráil, nochtadh, scriosadh, nó próiseáil eile, a dhéantar de thaisme nó go neamhúdaraíthe, nó ar chaillteanas nó ar athrú nó ar easpa infhaighteachta;
- (d) ■ go dtabharfar infhaighteacht sonraí, seirbhísí agus feidhmeanna, agus rochtain orthu sin, ar ais go tráthúil i gcás ina dtarlaíonn teagmhas fisiciúil nó teicniúil;

- (e) ■ nach bhféadfaidh daoine, cláir nó meaisíní údaraithe rochtain a fháil ach ar shonraí, seirbhísí agus feidhmeanna ar a bhfuil ceartha rochtana acu;
- (f) **chun** taifead a dhéanamh ar cé acu na sonraí, na seirbhísí nó na feidhmeanna a bhfuarthas rochtain orthu nó a úsáideadh nó a próiseáladh ar shlí eile, na hamanna a bhfuarthas an rochtain nó a ndearnadh an úsáid nó an phróiseáil agus an té a fuair an rochtain nó a rinne an úsáid nó an phróiseáil, agus é a shocrú go bhféadfar measúnú a dhéanamh ar an méid sin;
- (g) ■ go mbeidh na táirgí TFC, na seirbhísí TFC agus na próisis TFC ■ a úsáidtear i soláthar na seirbhísí slándála bainistithe slán de réir réamhshocrú agus de réir dearaidh **agus, i gcás inarb infheidhme**, go n-áireofar iontu na nuashonruithe slándála is déanaí **agus nach mbeidh leochaileachtaí atá aitheanta go poiblí iontu;**’;
- (11) Leasaítear Airteagal 52 mar a leanas:
- (a) cuirtear an méid seo a leanas in ionad mhír 1:
- ‘1. Féadfar ceann amháin nó níos mó de na leibhéil dearbhúcháin seo a leanas a shonrú i leith táirgí TFC, seirbhísí TFC, próisis TFC agus seirbhísí slándála bainistithe le scéim Eorpach um dheimhniú cibearshlándála: ‘bunúsach’, ‘substaintiúil’ nó ‘ard’. Beidh leibhéal an dearbhúcháin i gcomhréir leis an leibhéal riosca a bhaineann leis an úsáid a bheartaítear do tháirge TFC, do sheirbhís TFC, do phróiseas TFC nó do sheirbhís slándála bhainistithe, i dtéarmaí a dhóchúla atá sé go dtarlóidh teagmhas agus i dtéarmaí thionchar an teagmhais.’;

- (b) cuirtear na méid seo a leanas in ionad mhír 3:
- ‘3. Na ceanglais slándála a chomhfhreagraíonn do gach leibhéal dearbhúcháin, sonrúfar iad sa scéim Eorpach ábhartha um dheimhniú cibearshlándála, lena n-áirítear na feidhmiúlachtaí slándála comhfhreagracha agus déine agus doimhneacht chomhfhreagrach na meastóireachta a dhéanfar ar an táirge TFC, ar an tseirbhís TFC, ar an bpróiseas TFC nó ar an tseirbhís slándála bhainistithe.’;
- (c) cuirtear an méid seo a leanas in ionas mhíreanna 5, 6 agus 7:
- ‘5. Le deimhniú Eorpach cibearshlándála nó ráiteas comhréireachta ón Aontas lena dtagraítear do leibhéal dearbhúcháin ‘bunúsach’, tabharfar dearbhú go gcomhlíontar na ceanglais slándála chomhfhreagracha leis na táirgí TFC, na seirbhísí TFC, na próisis TFC agus na seirbhísí slándála bainistithe a bhfuil an deimhniú sin nó an ráiteas comhréireachta ón Aontas sin eisiithe ina leith, lena n-áirítear feidhmiúlachtaí slándála, agus go ndearnadh meastóireacht orthu go leibhéal iomchuí lena bhféachtar leis na rioscaí bunúsacha atá aitheanta i leith cibeartheagmhas agus cibirionsaithe a íoslághdú. Áireofar sna gníomhaíochtaí meastóireachta, ar a laghad athbhreithniú ar dhoiciméadacht theicniúil. Nuair nach bhfuil meastóireacht den sórt sin iomchuí, úsáidfear gníomhaíochtaí ionadaíocha iontu lena ngabhfaidh éifeacht choibhéiseach.

6. Le deimhniú Eorpach cibearshlándála lena dtagraítear do leibhéal dearbhúcháin ‘substaintiúil’, tabharfar dearbhú go gcomhlíontar na ceanglais slándála chomhfhreagracha leis na táirgí TFC, na seirbhísí TFC, na próisis TFC agus na seirbhísí slándála bainistithe a bhfuil an deimhniú sin eisithe ina leith, lena n-áirítear feidhmiúlachtaí slándála, agus go ndearnadh meastóireacht orthu go leibhéal iomchuí lena bhféachtar le híoslaghdú a dhéanamh ar na rioscaí cibearshlándála aitheanta, agus ar bhaol teagmhas agus cibirionsaithe a dhéanann gníomhaithe a bhfuil scileanna agus acmhainní teoranta acu. Áireofar na nithe seo a leanas ar a laghad sna gníomhaíochtaí meastóireachta: athbhreithniú chun an easpa leochaileachtaí atá aitheanta go poiblí a léiriú agus tástáil chun a léiriú go ndéantar na feidhmiúlachtaí slándála is gá a chur chun feidhme mar is ceart leis na táirgí TFC, na seirbhísí TFC, na próisis TFC nó na seirbhísí slándála bainistithe. I gcás nach bhfuil gníomhaíochtaí meastóireachta den sórt sin iomchuí, déanfar gníomhaíochtaí ionadaíocha lena ngabhfaidh éifeacht choibhéiseach.

7. Le deimhniú Eorpach cibearshlándála lena dtagraítear do leibhéal dearbhúcháin ‘ard’, tabharfar dearbhú go gcomhlíontar na ceanglais slándála chomhfhreagracha leis na táirgí TFC, na seirbhísí TFC, na próisis TFC agus na seirbhísí slándála bainistithe a bhfuil an deimhniú sin eisithe ina leith, lena n-áirítear feidhmiúlachtaí slándála, agus go ndearnadh meastóireacht orthu go leibhéal iomchuí lena bhféachtar le híoslachdú a dhéanamh ar an mbaol go ndéanfadh gníomhaithe a bhfuil scileanna agus acmhainní suntasacha acu cibirionsaithe úrscothacha. Áireofar na nithe seo a leanas ar a laghad sna gníomhaíochtaí meastóireachta: athbhreithniú chun easpa leochaileachtaí atá aitheanta go poiblí a léiriú; tástáil chun a léiriú go ndéantar, leis na táirgí TFC, na seirbhísí TFC, na próisis TFC nó na seirbhísí slándála bainistithe, na feidhmiúlachtaí slándála is gá a chur chun feidhme mar is ceart, ar an mbonn úrscothach; agus measúnú ar a bhfriotaíocht in aghaidh ionsaitheoirí oilte, trí thástáil treáite. I gcás nach bhfuil gníomhaíochtaí den sórt sin iomchuí, déanfar gníomhaíochtaí ionadaíocha lena ngabhfaidh éifeacht choibhéiseach.’;

(12) in Airteagal 53, cuirtear an méid seo a leanas in ionad mhíreanna 1, 2 agus 3:

- ‘1. D’fhéadfaí a cheadú, le scéim Eorpach um dheimhniú cibearshlándála, féinmheasúnú comhréireachta a chur i gcrích faoi fhreagracht mhonaróir nó sholáthraí na dtáirgí TFC, na seirbhísí TFC, na bpróiseas TFC nó na seirbhísí slándála bainistithe agus faoina bhfreagracht siúd amháin. Ní cheadófar féinmheasúnú comhréireachta ach amháin maidir le táirgí TFC, seirbhísí TFC, próisis TFC agus seirbhísí slándála bainistithe a mbaineann riosca íseal leo a chomhfhreagraíonn do leibhéal dearbhaithe ‘bunúsach’.
2. Féadfaidh monaróir nó soláthraí na dtáirgí TFC, na seirbhísí TFC, na bpróiseas TFC nó na seirbhísí slándála bainistithe ráiteas comhréireachta ón Aontas a eisiúint ina ndeirtear gur léiríodh gur comhlíonadh na ceanglais a leagtar amach sa scéim. Trí ráiteas den sórt sin a eisiúint, glacann monaróir nó soláthraí na dtáirgí TFC, na seirbhísí TFC, na bpróiseas TFC nó na seirbhísí slándála bainistithe freagracht as comhlíontacht an táirge TFC, na seirbhíse TFC, an phróisis TFC nó na seirbhíse slándála bainistithe leis na ceanglais a leagtar amach sa scéim sin.

3. Déanfaidh monaróir nó soláthraí na dtáirgí TFC, na seirbhísí TFC, na bpróiseas TFC nó na seirbhísí slándála bainistithe an ráiteas comhréireachta ón Aontas, an doiciméadacht theicniúil, agus an fhaisnéis ábhartha uile eile a bhaineann le comhréireacht na dtáirgí TFC, na seirbhísí TFC nó na seirbhísí slándála bainistithe le scéim a chur ar fáil don údarás náisiúnta um dheimhniú cibearshlándála dá dtagraítear in Airteagal 58 ar feadh na tréimhse dá bhforáiltear sa scéim Eorpach chomhfhreagrach um dheimhniú cibearshlándála. Cuirfear cóip den ráiteas comhréireachta ón Aontas faoi bhráid an údaráis náisiúnta um dheimhniú cibearshlándála agus faoi bhráid ENISA.’;

(13) in Airteagal 54, leasaítear mír 1 mar a leanas:

(a) cuirtear an méid seo a leanas in ionad phointe (a):

‘(a) ábhar agus raon feidhme na scéime deimhniúcháin, lena n-áirítear cineál nó catagóirí na dtáirgí TFC, na seirbhísí TFC, na bpróiseas TFC agus na seirbhísí slándála bainistithe a chumhdaítear;’;

(aa) cuirtear an méid seo a leanas in ionad phointe (g):

‘(g) na critéir agus modhanna meastóireachta sonracha a bheidh le húsáid, lena n-áirítear na cineálacha meastóireachta, chun a léiriú go bhfuil na cuspóirí slándála is infheidhme dá dtagraítear in Airteagail 51 agus 51a bainte amach;’;

(b) cuirtear an méid seo a leanas in ionad phointe (j):

‘(j) rialacha maidir le faireachán a dhéanamh ar chomhlíontacht na dtáirgí TFC, na seirbhísí TFC, na bpróiseas TFC agus na seirbhísí slándála bainistithe le ceanglais na ndeimhnithe Eorpacha cibearshlándála nó ceanglais na ráiteas comhréireachta ón Aontas, lena n-áirítear sásraí lena léiriú go bhfuil na ceanglais chibearshlándála shonraithe á gcomhlíonadh go leanúnach;’;

(c) cuirtear an méid seo a leanas in ionad phointe (l):

‘(l) rialacha a bhaineann leis na hiarmhairtí le haghaidh na dtáirgí TFC, na seirbhísí TFC, na bpróiseas TFC agus na seirbhísí slándála bainistithe atá deimhnithe nó ar eisíodh ráiteas comhréireachta ón Aontas ina leith, ach nach gcomhlíontar ceanglais na scéime leo;’;

(d) cuirtear an méid seo a leanas in ionad phointe (o):
'(o) scéimeanna a shainnithint, ar scéimeanna náisiúnta nó idirnáisiúnta um dheimhniú cibearshlándála iad, lena gcumhdaítear an cineál céanna nó na catagóirí céanna táirgí TFC, seirbhísí TFC, próiseas TFC agus seirbhísí slándála bainistithe, ceanglas slándála, critéar agus modhanna meastóireachta, agus leibhéal dearbhúcháin;';

(e) cuirtear an méid seo a leanas in ionad pointe (q):
'(q) tréimhse infhaighteachta an ráitis comhréireachta ón Aontas, na doiciméadachta teicniúla agus na faisnéise ábhartha uile eile atá le cur ar fáil ag monaróir nó soláthraí na dtáirgí TFC, na seirbhísí TFC, na **bpróiseas** TFC nó ■ na seirbhísí slándála bainistithe;';

(14) Leasaítear Airteagal 56 mar a leanas:

(a) cuirtear an méid seo a leanas in ionad mhír 1:
'1. Measfar go gcomhlíontar ceanglais scéime Eorpaí um dheimhniú cibearshlándála arna glacadh de bhun Airteagal 49 le táirgí TFC, seirbhísí TFC, próisis TFC agus seirbhísí slándála bainistithe arna ndeimhniú faoi scéim den chineál sin';.

- (b) leasaítear mír 3 mar a leanas:
- (i) cuirtear an méid seo a leanas in ionad na chéad fhomhíre:
‘Déanfaidh an Coimisiún measúnú go tráthrialta ar éifeachtúlacht agus ar úsáid na scéimeanna Eorpacha um dheimhniú cibearshlándála arna nglacadh agus i dtaobh an bhfuil scéim Eorpach shonrach um dheimhniú cibearshlándála le déanamh sainordaitheach trí reachtaíocht ábhartha an Aontais chun leibhéal leormhaith cibearshlándála a áirithiú le haghaidh táirgí TFC, seirbhísí TFC, próisis TFC agus seirbhísí slándála bainistithe san Aontas agus chun feidhmiú an mhargaidh inmheánaigh a fheabhsú. Déanfar an chéad mheasúnú den sórt sin faoin 31 Nollaig 2023, agus déanfar measúnuithe ina dhiaidh sin gach dhá bhliain ar a laghad ina dhiaidh sin. Ar bhonn thoradh na measúnuithe sin, sainaitheoidh an Coimisiún na táirgí TFC, na seirbhísí TFC, na próisis TFC agus na seirbhísí slándála bainistithe a chumhdaítear le scéim deimhniúcháin atá ann cheana agus beidh siad cumhdaithe le scéim deimhniúcháin shainordaitheach.’;

- (ii) leasaítear an tríú mír mar a leanas:
- (aa) cuirtear an méid seo a leanas in ionad phointe (a):
- ‘(a) tionchar na mbeart ar mhonaróirí nó ar sholáthraithe na dtáirgí TFC, na seirbhísí TFC, na bpróiseas TFC agus na seirbhísí slándála bainistithe sin a chur san áireamh, agus an tionchar ar na húsáideoirí i dtéarmaí chostas na mbeart sin agus na leasanna sochaíocha nó eacnamaíocha a eascraíonn as an leibhéal feabhsaithe slándála a bhfuil coinne leis i leith na dtáirgí TFC, na seirbhísí TFC, na bpróiseas TFC nó na seirbhísí slándála bainistithe spriocdhírthe;’;
- (bb) cuirtear an méid seo a leanas in ionad phointe (d):
- ‘(d) na nithe seo a leanas a chur san áireamh: aon sprioc-am cur chun feidhme, aon bheart idirthréimhseach agus aon tréimhse idirthréimhseach, go háirithe maidir leis an tionchar a d’fhéadfadh a bheith ag an mbeart ar mhonaróirí nó soláthraithe na dtáirgí TFC, na seirbhísí TFC, na bpróiseas TFC nó na seirbhísí slándála bainistithe, lena n-áirítear ***leasanna sonracha agus riachtanais shonracha micrifhiontar agus*** FBManna;’;

(c) cuirtear an méid seo a leanas in ionad mhíreanna 7 agus 8:

- ‘7. An duine nádúrtha nó dlítheanach a chuireann táirgí TFC, seirbhísí TFC, próisis TFC nó seirbhísí slándála bainistithe isteach le haghaidh deimhniúcháin, cuirfidh sé an fhaisnéis go léir is gá chun an próiseas deimhniúcháin a dhéanamh ar fáil don údarás náisiúnta um dheimhniú cibearshlándála dá dtagraítear in Airteagal 58, i gcás inarb ionann an t-údarás sin agus an comhlacht a eisíonn an deimhniú Eorpach cibearshlándála, nó don chomhlacht um measúnú comhréireachta dá dtagraítear in Airteagal 60.
8. An té a mbeidh deimhniú Eorpach cibearshlándála ina sheilbh, cuirfidh sé an t-údarás nó an comhlacht dá dtagraítear i mír 7 ar an eolas faoi aon leochaileacht nó neamhrialtacht a bhraitear ina dhiaidh sin maidir le slándáil an táirge TFC, na seirbhíse TFC, an phróisis TFC nó na seirbhísí slándála bainistithe atá deimhnithe a d’fhéadfadh tionchar a bheith acu ar chomhlíonadh na gceanglas a bhaineann leis an deimhniú. Cuirfidh an t-údarás nó an comhlacht sin an fhaisnéis sin ar aghaidh gan aon mhoill mhíchuí chuig an údarás náisiúnta um dheimhniú cibearshlándála lena mbaineann.’;

- (15) in Airteagal 57, cuirtear an méid seo a leanas in ionad mhíreanna 1 agus 2:
- ‘1. Gan dochar do mhír 3 den Airteagal seo, scoirfidh scéimeanna náisiúnta um dheimhniú cibearshlándála agus na nósanna imeachta gaolmhara do tháirgí TFC, seirbhísí TFC, próisis TFC agus seirbhísí slándála bainistithe arna gcumhdach ag scéim Eorpach um dheimhniú cibearshlándála d’éifeachtaí a bheith acu ón dáta arna bhunú leis an ngníomh cur chun feidhme arna ghlacadh de bhun Airteagal 49(7). Scéimeanna náisiúnta um dheimhniú cibearshlándála agus na nósanna imeachta gaolmhara do tháirgí TFC, seirbhísí TFC, próisis TFC agus na seirbhísí slándála bainistithe nach gcumhdaítear le scéim Eorpach um dheimhniú cibearshlándála, leanfaidh na scéimeanna sin de bheith infheidhme.
 2. Ní dhéanfaidh na Ballstáit scéimeanna náisiúnta nua um dheimhniú cibearshlándála a thabhairt isteach le haghaidh táirgí TFC, seirbhísí TFC, próisis TFC agus seirbhísí slándála bainistithe a chumhdaítear cheana faoi scéim Eorpach um dheimhniú cibearshlándála atá i bhfeidhm.’;

(16) Leasaítear Airteagal 58 mar a leanas:

(a) leasaítear mír 7 mar a leanas:

(i) cuirtear an méid seo a leanas in ionad phointí (a) agus (b):

‘(a) rialacha a áirítear i scéimeanna Eorpacha um dheimhniú cibearshlándála de bhun phointe (j) d’Airteagal 54(1) maidir le faireachán a dhéanamh ar chomhlíonadh cheanglais na ndeimhnithe Eorpacha cibearshlándála a eisíodh ar a gcríocha féin le táirgí TFC, seirbhísí TFC, próisis TFC agus seirbhísí slándála bainistithe, na rialacha sin a mhaoirsiú agus a fhorfheidhmiú i gcomhar le húdaráis ábhartha eile um fhaireachas margaidh;

(b) faireachán a dhéanamh ar chomhlíonadh na n-oibleagáidí atá ar mhonaróirí nó ar sholáthraithe na dtáirgí TFC, na seirbhísí TFC, na bpróiseas TFC nó na seirbhísí slándála bainistithe atá bunaithe ar a gcríocha féin, agus a chuireann féinmheasúnú comhréachta i gcrích, agus na hoibleagáidí sin a fhorfheidhmiú, agus go háirithe, faireachán a dhéanamh ar chomhlíonadh oibleagáidí na monaróirí nó na soláthraithe sin a leagtar amach in Airteagal 53(2) agus (3) agus sa scéim Eorpach chomhfhreagrach um dheimhniú cibearshlándála, agus na hoibleagáidí sin a fhorfheidhmiú;’;

(ii) cuirtear an méid seo a leanas in ionad phointe (h):

‘(h) oibriú i gcomhar le húdaráis náisiúnta eile um dheimhniú cibearshlándála nó le húdaráis phoiblí eile, lena n-áirítear trí fhaisnéis a chomhroinnt faoi na cásanna sin inar féidir nach bhfuil ceanglais an Rialacháin seo nó ceanglais na scéimeanna Eorpacha sonracha um dheimhniú cibearshlándála á gcomhlíonadh le táirgí TFC, seirbhísí TFC, próisis TFC agus seirbhísí slándála bainistithe; agus;’;

(b) cuirtear na méid seo a leanas in ionad mhír 9:

‘9. Oibreoidh údaráis náisiúnta um dheimhniú cibearshlándála i gcomhar le chéile agus leis an gCoimisiún agus, go háirithe, trí fhaisnéis, taithí agus dea-chleachtais a mhalartú maidir leis an deimhniú cibearshlándála agus saincheisteanna teicniúla a bhaineann le cibearshlándáil na dtáirgí TFC, na seirbhísí TFC, *na bpróiseas* TFC agus na seirbhísí slándála bainistithe.’;

- (17) in Airteagal 59(3), cuirtear an méid seo a leanas in ionad phointí (b) agus (c):
- ‘(b) na nósanna imeachta maidir le maoirseacht agus forfheidhmiú a dhéanamh ar na rialacha maidir le faireachán a dhéanamh ar chomhlíonadh deimhnithe Eorpacha cibearshlándála de bhun Airteagal 58(7), pointe (a) le táirgí TFC, seirbhísí TFC, próisis TFC agus seirbhísí slándála bainistithe;
 - (c) na nósanna imeachta maidir le faireachán agus forfheidhmiú a dhéanamh ar oibleagáidí monaróirí nó soláthraithe na dtáirgí TFC, na seirbhísí TFC, na bpróiseas TFC nó na seirbhísí slándála bainistithe de bhun Airteagal 58(7), pointe (b);’;
- (18) in Airteagal 67, cuirtear an méid seo a leanas in ionad mhíreanna 2 agus 3:
2. Leis an meastóireacht sin déanfar measúnú freisin ar thionchar, éifeachtacht agus éifeachtúlacht fhorálacha Theideal III den Rialachán seo, ***lena n-áirítear na nósanna imeachta as a dtagann glacadh na scéimeanna um dheimhniú cibearshlándála agus a mbonn fianaise***, i dtaca leis na cuspoirí leibhéal leormhaith cibearshlándála a áirithiú do tháirgí TFC, seirbhísí TFC, próisis TFC agus seirbhísí slándála bainistithe san Aontas agus feidhmiú an mhargaidh inmheánaigh a fheabhsú.
 3. Leis an meastóireacht, déanfar measúnú ar cibé an bhfuil gá le ceanglais riachtanacha chibearshlándála i dtaca le rochtain a fháil ar an margadh inmheánach chun cosc a chur ar tháirgí TFC, seirbhísí TFC, próisis TFC agus seirbhísí slándála bainistithe nach gcomhlíonann ceanglais chibearshlándála bhunúsacha teacht isteach ar mhargadh an Aontais.’
- (19) ***cuirtear an téacs a leagtar amach san Iarscríbhinn a ghabhann leis an Rialachán seo in ionad na hIarscríbhinne.***

Airteagal 2

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh in/sa...,

*Thar ceann Pharlaimint na hEorpa
An tUachtarán*

*Thar ceann na Comhairle
An tUachtarán*

IARSCRÍBHINN

NA CEANGLAIS ATÁ LE COMHLÍONADH AG NA COMHLACHTAÍ UM MEASÚNÚ COMHRÉIREACHTA

Comhlíonfaidh na comhlachtaí ar mian leo creidiúnú a fháil na ceanglais seo a leanas:

- 1. Bunófar comhlacht um measúnú comhréireachta faoin dlí náisiúnta agus beidh pearsantacht dhlítheanach aige.*
- 2. Beidh comhlacht um measúnú comhréireachta ina chomhlacht tríú páirtí agus é neamhspleách ar an eagraíocht nó ar na táirgí TFC, na seirbhísí TFC, na próisis TFC nó na seirbhísí slándála bainistithe a ndéanann sé measúnú orthu.*
- 3. Féadfar a mheas gur comhlacht um measúnú comhréireachta é comhlacht a bhaineann le comhlachas gnó nó le cónaidhm ghairmiúil a dhéanann ionadaíocht ar ghnóthais a bhíonn ag plé le dearadh, monarú, soláthar, cóimeáil, úsáid nó cothabháil táirgí TFC, seirbhísí TFC, próisis TFC nó seirbhísí slándála bainistithe a ndéanann sé measúnú orthu, ar choinníoll go léirítear go bhfuil sé neamhspleách agus nach bhfuil aon choinbhleacht leasa ann.*
- 4. Comhlachtaí um measúnú comhréireachta, lucht a ardbhainistíochta agus na daoine atá freagrach as cúraimí an mheasúnaithe comhréireachta a chur i gcrích, ní bheidh siad ina ndearthóirí, ina monaróirí, ina soláthraithe, ina suiteálaithe, ina gceannaitheoirí, ina n-úinéirí, ina n-úsáideoirí nó ina gcothabhálaithe ar an táirge TFC, ar an tseirbhís TFC, ar an bpróiseas TFC nó ar an tseirbhís slándála bhainistithe a dhéantar a mheasúnú, ná ní bheidh siad ina n-ionadaithe údaraithe*

de chuid aon cheann de na páirtithe sin. Ní choisfear, leis an gcosc sin, táirgí TFC a rinneadh measúnú orthu a úsáid a bhfuil gá leo i dtaca le hoibríochtaí an chomhlachta um measúnú comhréireachta nó táirgí TFC sin a úsáid chun críocha pearsanta.

5. *Maidir le comhlachtaí um measúnú comhréireachta agus lucht a ardbhainistíochta, agus maidir leis na daoine atá freagrach as an measúnú comhréireachta a chur i gcrích, ní bheidh baint dhíreach acu le dearadh, monarú nó tógáil, le soláthar, le margaíocht, le suiteáil, le húsáid nó le cothabháil na dtáirgí TFC, na seirbhísí TFC, na bpróiseas TFC ná le seirbhísí slándála bainistithe a ndéantar measúnú orthu, ná ní dhéanfaidh siad ionadaíocht ar pháirtithe a ghabhann de na gníomhaíochtaí sin. Ní ghabhfaidh na comhlachtaí um measúnú comhréireachta, lucht a ardbhainistíochta agus na daoine atá freagrach as an measúnú comhréireachta a chur i gcrích d'aon ghníomhaíocht a d'fhéadfadh teacht salach ar neamhspleáchas a mbreithiúnais ná a n-ionracais i ndáil le gníomhaíochtaí um measúnú comhréireachta. Beidh feidhm ag an gcosc sin go háirithe maidir le seirbhísí comhairliúcháin.*
6. *Más le heintíteas poiblí nó le hinstiúid phoiblí comhlacht um measúnú comhréireachta nó má tá sé á fheidmiú acu, déanfar neamhspleáchas agus neamhláithreacht aon choinbhleachta leasa a áirithiú agus a dhoiciméadú idir an t-údarás náisiúnta um dheimhniú cibearshlándála, agus an comhlacht um measúnú comhréireachta.*
7. *Áiritheoidh comhlachtaí um measúnú comhréireachta nach ndéanfaidh gníomhaíochtaí a bhfochuideachtaí ná a bhfochonraitheoirí difear do rúndacht, d'oibiachtúlacht ná do neamhchlaontacht a ngníomhaíochtaí um measúnú comhréireachta.*
8. *Déanfaidh na comhlachtaí um measúnú comhréireachta agus a bhfoireann na gníomhaíochtaí um measúnú comhréireachta a chur i gcrích de réir an leibhéal is airde ionracais ghairmiúil agus de réir na hinniúlachta teicniúla is gá sa réimse sonrath lena mbaineann, agus beidh siad saor ó gach cineál brú agus aslaigh lena n-áirítear brú agus aslach de chineál airgeadais, a bhféadfadh tionchar a bheith acu ar a mbreithiúnas nó ar thorthaí a ngníomhaíochtaí um measúnú comhréireachta, go háirithe a mhéid a bhaineann le daoine nó grúpaí a mbeadh leas acu as torthaí na ngníomhaíochtaí sin.*

9. *Beidh ar chumas an chomhlachta um measúnú comhréireachta na cúraimí measúnaithe comhréireachta go léir a chur i gcrích a shanntar dó faoin Rialachán seo, cibé acu a dhéanann an comhlacht um measúnú comhréireachta féin na cúraimí sin a chur i gcrích nó a dhéantar thar a cheann agus faoina fhreagracht iad. Maidir le haon fhochonraitheoireacht nó aon chomhairliúchán le foireann sheachtrach, déanfar iad a dhoiciméadú i gceart, ní bheidh aon idirghabhálaithe bainteach leo agus beidh siad faoi réir comhaontú i scríbhinn ina gcumhdófar, i measc nithe eile, rúndacht agus coinbhleachtaí leasa. Glacfaidh an comhlacht um measúnú comhréireachta lena mbaineann lánfhreagracht as na cúraimí a dhéantar.*
10. *Le haghaidh gach nós imeachta um measúnú comhréireachta agus le haghaidh gach cineáil, catagóire agus fochatagóire táirgí TFC, seirbhísí TFC, próisis TFC nó seirbhísí slándála bainistithe, beidh na nithe seo a leanas ar fáil do chomhlacht um measúnú comhréireachta i gcónaí:*
- (a) *foireann ag a bhfuil eolas teicniúil agus taithí leormhaith iomchuí chun na cúraimí um measúnú comhréireachta a chur i gcrích;*
 - (b) *tuairiscí ar na nósanna imeachta ar i gcomhréir leo a dhéantar an measúnú comhréireachta, chun trédhearcacht na nósanna imeachta sin agus an fhéidearthacht iad a atáirgeadh a úirithiú. Beidh beartais agus nósanna imeachta iomchuí i bhfeidhm aige lena ndéanfar idirdhealú idir na cúraimí a dhéanann sé mar chomhlacht faoina dtugtar fógra de bhun Airteagal 61 agus a ghníomhaíochtaí eile;*
 - (c) *na nósanna imeachta sin a ghabhann le gníomhaíochtaí a chur i gcrích a chuireann san áireamh méid an ghnóthais, an earnáil ina bhfuil sé ag oibriú, a struchtúr, castacht theicneolaíocht an táirge TFC, na seirbhíse TFC, an phróisis TFC nó na seirbhíse slándála bhainistithe atá i gceist agus cineál an phróisis táirgthe, is é sin, cé acu olltáirgeadh nó táirgeadh sraithe é.*
11. *Beidh ag comhlacht um measúnú comhréireachta na hacmhainní is gá chun na cúraimí teicniúla agus riaracháin a bhaineann leis na gníomhaíochtaí um measúnú comhréireachta a dhéanamh ar bhealach iomchuí, agus beidh rochtain aige ar an trealamh agus ar na saoráidí uile is gá.*
12. *Beidh na hinniúlachtaí seo a leanas ag na daoine atá freagrach as na*

gníomhaíochtaí um measúnú comhréireachta a dhéanamh:

- (a) oiliúint mhaith theicniúil agus ghairme a chumhdóidh na gníomhaíochtaí uile um measúnú comhréireachta;*
 - (b) eolas sásúil ar na ceanglais a bhíonn i gceist sna measúnuithe comhréireachta a dhéanann siad agus údarás leormhaith chun na measúnuithe sin a dhéanamh;*
 - (c) eolas agus tuiscint iomchuí ar na ceanglais is infheidhme agus ar na caighdeáin tástála;*
 - (d) an cumas deimhnithe, taifid agus tuarascálacha a ullmhú lena dtaispeánfar gur cuireadh measúnuithe comhréireachta i gcrích.*
- 13. Ráthófar neamhchlaontacht na gcomhlachtaí um measúnú comhréireachta, lucht a ardbhainistíochta, na ndaoine atá freagrach as na gníomhaíochtaí um measúnú comhréireachta agus aon fochonraitheoirí.*
- 14. Ní bheidh luach saothair an lucht ardbhainistíochta agus na ndaoine atá freagrach as na gníomhaíochtaí um measúnú comhréireachta ag brath ar líon na measúnuithe comhréireachta a chuirfear i gcrích ná ar thorthaí na measúnuithe sin.*
- 15. Rachaidh comhlachtaí um measúnú comhréireachta faoi árachas dliteanais ach amháin má ghabhann an Ballstát dliteanas air féin i gcomhréir leis an dlí náisiúnta, nó i gcás inarb é an Ballstát féin atá freagrach go díreach as an measúnú comhréireachta.*
- 16. Déanfaidh an comhlacht um measúnú comhréireachta agus a bhaill foirne, coistí, fochuideachtaí, fochonraitheoirí, agus aon chomhlacht gaolmhar nó baill foirne de chuid comhlachtaí seachtracha dá chuid rúndacht a choinneáil agus urramóidh siad rúndacht ghairmiúil maidir leis an bhfaisnéis uile a fhaightear agus a gcuid cúraimí um measúnú comhréireachta á gcomhlíonadh acu faoin Rialachán seo nó de bhun aon fhoráil de chuid an dlí náisiúnta a thugann éifeacht don Rialachán seo, ach amháin i gcás ina gceanglaítear nochtadh le dlí an Aontais nó le dlí Ballstáit a bhfuil daoine mar sin faoina réir, agus seachas maidir le húdaráis inniúla na mBallstát ina ndéantar na gníomhaíochtaí. Déanfar cearta maoine intleachtúla a chosaint. Beidh nósanna imeachta doiciméadaithe i bhfeidhm ag an gcomhlacht um measúnú comhréireachta i dtaca le ceanglais an phointe seo.*

17. *Cé is moite de pointe 16, le ceanglais na hIarscríbhíne seo, ní chuirfear bac ar bith ar fhaisnéis theicniúil agus treoir rialála a mhalartú idir comhlacht um measúnú comhréireachta agus duine atá ag cur isteach ar dheimhniú nó atá ag machnamh ar chur isteach ar dheimhniú.*
18. *Oibreoidh comhlachtaí um measúnú comhréireachta i gcomhréir le tacar téarmaí agus coinníollacha atá comhsheasmhach, cothrom agus réasúnach, agus leasanna FBManna i ndáil le táillí á gcur san áireamh acu.*
19. *Comhlíonfaidh na comhlachtaí um measúnú ceanglais an chaighdeáin ábhartha a chomhchuíbítear faoi Rialachán (CE) Uimh. 765/2008 le haghaidh creidiúnú comhlachtaí um measúnú comhréireachta a dhéanann táirgí TFC, seirbhísí TFC, próisis TFC nó seirbhísí slándála bainistithe a dheimhniú.*
20. *Áiritheoidh na comhlachtaí um measúnú comhréireachta go sásóidh na saotharlanna tástála a úsáidfear chun críoch measúnúcháin comhréireachta ceanglais an chaighdeáin ábhartha a chomhchuíbítear faoi Rialachán (CE) Uimh. 765/2008 le haghaidh creidiúnú saotharlanna a dhéanann tástáil.*

Or. en